

摘藻堂四庫全書薈要

集部

欽定四庫全書薈要

集部

東坡全集卷八

七



詳校官助教臣常循

欽定四庫全書薈要卷一萬四千八百三十九

集部

東坡全集卷七

宋 蘇軾 撰

詩八十三首

次韻章傳道喜雨

禱常山而得



去年夏旱秋不雨海畔居民飲鹹苦今年春暖欲生蛟

地上戢戢多於土預憂一旦開兩翅口吻如風那肯吐

前時渡江入吳越布陣橫空如項羽

去歲錢塘見飛蝗自西北來極可畏

農夫拱手但垂泣人力區區固難禦撲緣駿尾困牛馬

啖齧衣服穿房戶坐觀不救亦何心秉畀炎火傳自古
荷鋤散掘誰敢後得米濟饑還小補常山山神信英烈
撝駕雷公訶電母應憐郡守老且愚欲把瘡痍手摩撫
山中歸時風色變中路已覺商羊舞夜聽騷騷鬧松竹
朝畦泣泣流膏乳從來蝗旱必相資此事吾聞老農語
庶將積潤掃遺孽收拾豐歲還明主縣前已害八千斛
今春及今得蝗子八千餘斛率以一升完一畝更省蠶婦過初眠一
眠則蝗不復生矣未用賀客來旁午先生筆力吾所畏蹙踏鮑

謝跨徐庾偶然談笑得佳篇便恐流傳成樂府陋邦一
雨何足道吾君盛德九州晉中和樂職幾時作試向諸
生選何武

謝郡人田賀二生獻花

城裏田員外城西賀秀才不愁家四壁自有錦千堆珍
重尤奇品艱難寂後開芳心困落日薄艷戰輕雷昨日雷雨

老守仍多病壯懷先已灰慙慙此粲者賀獻魏花三朵攀折為

誰哉玉腕揜紅袖金樽瀉白醅何當鑷霜鬢強插滿頭

迴

惜花

吉祥寺中錦千堆

錢塘花最盛處

前年賞花真盛哉道人勸我

清明來腰鼓百面如春雷打徹涼州花自開沙河塘上

插花回醉倒不覺吳兒咍豈知如今雙鬢催城西古寺

沒蒿萊有僧閉門手自栽千枝萬葉巧翦裁就中一叢

何所似馬腦盤盛金縷杯而我食菜方清齋對花不飲

花應猜夜來雨電加李梅紅殘綠暗吁可哀

和頓教授見寄

用除夜韻

我笑陶淵明種秫二頃半婦言既不用還有責子歎無
絃則無琴何必勞撫玩我笑劉伯倫醉髮蓬茹散二豪
苦不納獨以鍾自伴既死何用埋此身同夜旦孰云二
子賢自結兩重案笑人還自笑出口談治亂一生溷塵
垢晚以道自盟無成空得懶坐此百事緩仄聞頓夫子
講道出新貫豈無一尺書恐不記庸懦陋邦貧且病數
米銖稱炭慙愧章先生十日坐空館袖中出子詩貧讀

酒屢煖狂言各須慎勿使輸薪粲

和子由四首

韓太祝送遊太山

偶作郊原十日遊未應回首厭籠囚但教塵土驅馳足
終把雲山爛漫酬聞道逢春思濯錦便須到處覓菟裘
恨君不上東封頂夜看金輪出九幽

送春

夢裏青春可得追欲將詩句絆餘暉酒闌病客惟思睡

蜜熟黃蜂亦懶飛
芍藥櫻桃俱掃地

病過此
二物

鬢絲禪榻

兩忘機憑君借取法界觀一洗人間萬事非

來書云近
省此書余

未嘗
見也

首夏官舍即事

安石榴花開最遲
絳裙深樹出幽菲
吾廬想見無限好
客子倦遊胡不歸
座上一樽雖得滿
古來四事巧相違
令人却憶湖邊寺
垂柳陰陰晝掩扉

送李供備席上和李詩

家聲赫奕蓋并涼也解微吟錦瑟傍擘水取魚湖起浪
引杯看劍坐生光風流別後人人憶才器歸來種種長
不用更貪窮事業風騷分付與沉湘

西齋

西齋深且明中有六尺牀病夫朝睡足危坐覺日長昏
昏既非醉踽踽亦非狂褰衣竹風下穆然濯微涼起行
西園中草木含幽香榴花開一枝桑棗沃以光鳴鳩得
美蔭困立忘飛翔黃鳥亦自喜新音變圓吭杖藜觀物

化亦以觀我生萬物各得時我生日皇皇

小兒

小兒不識愁起坐牽我衣我欲嗔小兒老妻勸兒癡兒
癡君更甚不樂愁何為還坐愧此言洗盞當我前大勝
劉伶婦區區為酒錢

寄劉孝叔

君王有意誅驕虜摧破銅山鑄銅虎聯翩三十七將軍
走馬西來各開府南山伐木作車軸東海取鼉漫戰鼓

汗流奔走誰敢後恐乏軍興汙質斧保甲連村閭未遍
方田訟牒紛如雨爾來手實降新書抉剔根株窮脉縷
詔書惻怛信深厚吏能淺薄空勞苦平生學問止流俗
衆裏筌竿誰比數忽令獨奏鳳將雛倉卒欲吹那得譜
况復連年苦饑饉剝蠶草木啖泥土今年雨雪頗應時
又報蝗蟲生翅股憂來洗盞欲強醉寂寞虛齋卧空甌
公厨十日不生煙更望紅裙踏筵舞故人屢寄山中信
只有當歸無別語方將雀鼠偷太倉未肯衣冠掛神武

吳興丈人真得道平日立朝非小補自從四方冠蓋開
歸作二浙湖山主高蹤已自雜漁釣大隱何曾棄簪組
去年相從殊未足聞道已許談其祖逝將棄官往卒業
俗緣未盡那得覩公家只在雪溪上上有白雲如白羽
應憐進退苦皇皇更把安心教初祖

孔長源挽詞二首

少年才氣冠當時晚節孤風益自奇君勝宜為夫子後
材宗不愧蔡邕碑南荒尚記誅元惡東越誰能事細兒

耆舊如今幾人在為君無憾為時悲

小堰門頭柳繫船吳山堂上月侵筵潮聲夜半千巖響

詩句明朝萬口傳

長源自越過杭夜飲有美堂上聯句長源詩云天目遠隨雙鳳落海門遙

感兩潮趨一坐稱善

豈意日斜庚子後忽驚歲在己辰年佳城一

閉無窮事南望題詩淚灑牋

寄呂穆仲寺丞

孤山寺下水侵門每到先看醉墨痕楚相未亡談笑是

中郎不見典型存

杭有伶人善學呂舉措酷似別後常令作之以為笑

君先去踏

塵埃陌我亦來尋桑棗村回首西湖真一夢灰心霜鬢
更休論

余主簿母挽詞

閨庭蘭玉照鄉閭自昔雖貧樂有餘豈獨家人在中饋
却因麟趾識闕雎雲軒忽已歸仙府喬木依然擁舊廬
忍把還鄉千斛淚一時灑向老萊裾

送趙寺丞寄陳海州

景疎樓上喚峨眉君到應先誦此詩若見孟公投轄飲

莫忘衝雪送君時

答陳述古二首

漫說山東第二州
棗林桑泊負春遊
城西亦有紅千葉
人老簪花却自羞

小桃破萼未勝春
羅綺叢中第一人
聞道使君歸去後
舞衫歌扇總生塵

陳有小妓
述古稱之

張安道樂全堂

列子馭風殊不惡
猶被莊生譏數數
步兵飲酒中散琴

於此得全非至樂樂全居士全於天維摩丈室空翛然
平生痛飲今不飲無琴不獨琴無絃我公天與英雄表
龍章鳳姿照魚鳥但令端委坐廟堂北狄西戎談笑了
如今老去苦思歸小字親書寄我詩試問樂全全底事
無全何處更求虧

張文裕挽詞

高才本出朝廷右能事空推德業餘每見便聞曹植句
至今傳寶魏華書濟南名士新凋喪劔外生祠已潔除

欲寄西風兩行淚依然喬木鄭公廬

懷西湖寄晁美叔同年

西湖天下景遊者無愚賢深淺隨所得誰能識其全嗟
我本狂直早為世所捐獨專山水樂付與寧非天三百
六十寺幽尋遂窮年所至得其妙心知口難傳至今清
夜夢耳目餘芳鮮君持使者節風采爍雲煙清流與碧
嶽安肯為君妍胡不屏騎從暨借僧榻眠讀我壁間詩
清涼洗煩煎策杖無道路直造意所便應逢古漁父葦

間自延緣問道若有得買魚勿論錢

和梅戶曹會獵鐵溝

山西從古說三明誰信儒冠也捍城竿上鯨鯢猶未掩
近梟草中狐兔不須驚東州趙叟飲無敵南國梅仙詩
數盜

有聲不向如皋閑射雉歸來何以得卿卿

是日惟梅趙不射

祭常山回小獵

青蓋前頭點皂旗黃茅岡下出長圍弄風驕馬跑空立
趁鬼蒼鷹掠地飛回望白雲生翠巘歸來紅葉滿征衣

聖朝若用西涼簿白羽猶能效一揮

和章七出守湖州二首

方丈仙人出渺茫高情猶愛水雲鄉功名誰使連三捷
身世何緣得兩忘早歲歸休心共在他年相見話偏長
只應未報君恩重清夢時時到玉堂

絳闕雲臺總有名應須極貴又長生鼎中龍虎黃金賤

松下龜蛇綠骨輕

君好爐火餌茯苓

雲水未渾纓可濯弁峰初

見眼應明兩巵春酒真堪羨獨占人間分外榮

和張子野見寄三絕句

前生我已到杭州到處長如到舊遊更欲洞霄為隱吏
一庵閒地且相留過舊遊

狂吟跌宕無風雅醉墨淋漓不整齊應為詩人一回顧
山僧未忍掃黃泥見題壁

柏堂南畔竹如雲此閣何人是主人但遣先生披鶴氅
不須更畫樂天真竹閣見憶

和蔣夔寄茶

我生百事常隨緣四方水陸無不便扁舟渡江適吳越
三年飲食窮芳鮮金齏玉膾飯炊雪海螯江柱初脫泉
臨風飽食甘寢罷一甌花乳浮輕圓自從捨舟入東武
沃野便到桑麻川翦毛胡羊大如馬誰記鹿角腥盤筵
厨中蒸粟埋飯甕大杓更取酸生涎柘羅銅碾棄不用
脂麻白土須盆研故人猶作舊眼看謂我好尚如當年
沙溪北苑強分別水脚一線爭誰先清詩兩幅寄千里
紫金百餅費萬錢吟哦烹噉兩奇絕只恐偷乞煩封纏

老妻稚子不知愛一半已入薑鹽煎人生所遇無不可
南北嗜好知誰賢死生禍福久不擇更論甘苦爭蚩妍
知君窮旅不自釋因詩寄謝聊相鐫

答李邦直

美人如春風著物物未知羈愁似冰雪見子先流澌子
從徐方來吏民舉熙熙扶病出見之驚我一何衰知我
久慵倦起我以新詩詩詞如醇酒盎然薰四支徑飲不
覺醉欲和先昏疲西齋有蠻帳風雨夜紛披放懷語不

擇撫掌笑脫頤別來今幾何春物已含姿柳色日夜暗
子來竟何時徐方雖云樂東山禁遊嬉又無狂太守何
以解憂思聞子有賢婦華堂詠螽斯盍不倒囊索賣劍
買蛾眉不用教絲竹唱我新歌詞

和文與可洋川園池三十首

湖橋

朱欄畫柱照湖明白葛烏紗曳履行橋下龜魚晚無數
識君拄杖過橋聲

橫湖

貪看翠蓋擁紅粧不覺湖邊一夜霜
卷却天機雲錦段從教匹練寫秋光

書軒

雨昏石硯寒雲色風動牙籤亂葉聲
庭下已生書帶草使君疑是鄭康成

冰池

不嫌冰雪遶池看誰似詩人巧耐寒
記取羲之洗硯處

碧瑠璃下黑蛟蟠

竹塢

晚節先生道轉孤
歲寒惟有竹相娛
麤才杜牧真堪笑
喚作軍中十萬夫

荻浦

雨折霜乾不耐秋
白花黃葉使人愁
月明小艇湖邊宿
便是江南鸚鵡洲

蓼嶼

秋歸南浦蟬蛩鳴霜落橫湖沙水清卧雨幽花無限思
抱叢寒蝶不勝情

望雲樓

陰晴朝暮幾回新已向虛空付此身出本無心歸亦好
白雲還似望雲人

天漢臺

漾水東流舊見經銀潢左界上通靈此臺試向天文覓
閣道中間第幾星

待月臺

月與高人本有期
挂簷低戶映蛾眉
只從昨夜十分滿
漸覺冰輪出海遲

二樂榭

此間真趣豈容談
二樂并君已是三
仁智更煩訶妄見

坐令魯叟作瞿曇

來詩云二見因妄生

瀟泉亭

聞道池亭勝兩川
應須爛醉答雲煙
勸君多種長腰米

消破亭中萬斛泉

吏隱亭

縱橫憂患滿人間
頗怪先生日日閒
昨夜清風眠北牖
朝來爽氣在西山

霜筠亭

解籜新篁不自持
嬋娟已有歲寒姿
要省凜凜霜前意
須待秋風粉落時

無言亭

慙慙稽首維摩詰敢問如何是法門彈指未終千偈了
向人還道本無言

露香亭

亭下佳人錦繡衣滿身瓔珞綴明璣晚香消歇無尋處
花已飄零露已晞

函虛亭

水軒花榭兩爭妍秋月春風各自偏惟有此亭無一物
坐觀萬景得天全

溪光亭

決去湖波尚有情却隨初日動簷楹
溪光自古無人畫
憑仗新詩與寫成

過溪亭

身輕步穩去忘歸四柱亭前野竹微
忽悟過溪還一笑
水禽驚落翠毛衣

披錦亭

煙紅露綠曉風香燕舞鶯啼春日長
誰道使君貧且老

繡屏錦帳咽笙簧

楔亭

曲池流水細鱗鱗
高會傳觴似洛濱
紅粉翠蛾應不要
畫船來往勝於人

菡萏亭

日日移床趁下風
清香不盡思何窮
若為化作龜千歲
巢向田田亂葉中

茶縻洞

長憶故山寒食夜野荼蘼發暗香來分無素手簪羅髻
且折霜蕤浸玉醅

長憶故山一
作半雨半晴

資籥谷

漢川脩竹賤如蓬斤斧何曾赦籥龍料得清貧饒太守
渭濱千畝在胸中

寒蘆港

溶溶晴港漾春暉蘆笋生時柳絮飛還有江南風物否
桃花流水鱖魚肥

野人廬

少年辛苦事犁鉏
剛厭青山遠故居
老覺華堂無意味
却須時到野人廬

此君庵

寄語庵前抱節君
與君到處合相親
寫真雖是文夫子
我亦真堂作記人

金橙徑

金橙縱復里人知
不見鱸魚價自低
須是松江煙雨裏

小舩燒薤擣香薷

南園

不種夭桃與綠楊使君應欲候農桑
春畦雨過羅紈膩
夏壠風來餅餌香

北園

漢水巴山樂有餘一麾從此首歸塗
北園草木憑君問
許我他年作主無

寄題刁景純藏春塢

白首歸來種萬松待看千尺舞霜風年拋造物陶甄外
春在先生杖屨中楊柳長齊低戶暗櫻桃爛熟滴階紅
何時却與徐元直共訪襄陽龐德公

玉盤盂二首

并序

東武舊俗每歲四月大會于南禪資福兩寺以芍藥供
佛而今歲最盛凡七千餘朵皆重榭累萼繁麗豐碩中
有白花正圓如覆盂其下十餘葉稍大承之如盤姿格
絕異獨出于七千朵之上云得之於城北蘇氏園中周

宰相呂公之別業也而其名徧甚乃為易之

雜花狼藉占春餘芍藥開時掃地無兩寺粧成寶纓絡
一枝爭看玉盤盂佳名會作新翻曲絕品難尋舊畫圖
從此定知年穀熟姑山親見雪肌膚

花不能言意可知令君痛飲更無疑但持白酒勸嘉客
直待瓊舟覆玉彝負郭相君初擇地看羊屬國首吟詩
吾家豈與花相厚更問殘芳有幾枝

和潞公超然臺次韻

我公厭富貴常苦勲業尋相期赤松子永望白雲岑清
風出談笑萬竅為號吟吟成超然詩洗我蓬之心嗟我
本何人麋鹿強冠襟身微空志大交淺屢言深囑公如
得謝呼我幸寄音但恐酒錢盡煩公揮索金

聞喬太傅換左藏知欽州以詩招飲

今年果起故將軍幽夢清詩信有神馬革裹尸真細事
虎頭食肉更何人陣雲冷壓黃茆瘴羽扇斜揮白葛巾
痛飲從今有幾日西軒月色夜來新

喬將行烹鵞鹿出刀劔以飲客以詩戲之

破匣哀鳴出素虬倦看鵙鵙聽呦呦明朝只恐無烹鶴
此去還須却佩牛便可先呼報恩子不妨仍帶醉鄉侯
他年萬騎歸應好亦有移文在故丘

次韻劉貢父李公擇見寄二首

白髮相望兩故人眼看時事幾番新曲無和者應思郢

論少卑之且借秦歲惡詩人無好語

公擇來詩皆道夜
吳中饑苦之狀

長鰥守向誰親

貢父近
喪偶

少思多睡無如我鼻息雷鳴撼

四隣

何人勸我此間來
絃管生衣甌有埃
淶蟻濡脣無百斛
蝗蟲撲面已三回
磨刀入谷追窮寇
洒涕循城拾棄孩
為郡鮮歡君莫歎
猶勝塵土走章臺

寄黎眉州

膠西高處望西川
應在孤雲落照邊
瓦屋寒堆春後雪
峨眉翠掃雨餘天
治經方笑春秋學
好士今無六一賢
君以春秋受知於
歐陽文且待淵明
賦歸去共將詩酒
忠公公自號六一
居士

越流年

和趙郎中捕蝗見寄次韻

麥穗人許長穀苗牛可沒天公獨何意忍使蝗蟲發驅攘著令典農事安可忽我僕既胼胝我馬亦欵矻飛騰漸云少筋力亦已竭苟無百篇詩何以醒睡兀初如疏畎澮漸若決澣渤往來供十吏腕脫不容歇平生輕妄庸熟視笑魏勃愛君有逸氣詩壇專斬伐民病何時休吏職不可越慎無及世事向空書咄咄

登常山絕頂廣麗亭

西望穆陵關東望琅邪臺南望九僊山北望空飛埃相
將叫虞舜遂欲歸蓬萊嗟我二三子狂飲亦荒哉紅裙
欲先去長笛有餘哀清歌入雲霄妙舞纖腰回自從有
此山白石封蒼苔何嘗有此樂將去復徘徊人生如朝
露白髮日夜催棄置復何言萬劫終飛灰

薄薄酒二首 并序

膠西先生趙明叔家貧好飲不擇酒而醉常云薄薄酒

勝茶湯醜醜婦勝空房其言雖俚而近乎達故推而廣之以補東州之樂府既又以為未也復自和一篇聊以發覽者之一噓云耳

薄薄酒勝茶湯麤麤布勝無裳醜妻惡妾勝空房五更待漏靴滿霜不如三伏日高睡足北窓涼珠襦玉柙萬人祖送歸北邙不如懸鵲百結獨坐負朝陽生前富貴死後文章百年瞬息萬世忙夷齊盜蹠俱亡羊不如眼前一醉是非憂樂都兩忘

薄薄酒飲兩鍾麤麤布著兩重美惡雖異醉暖同醜妻
惡妾壽乃公隱居求志義之從本不計較東華塵土北
窓風百年雖長要有終富死未必輸生窮但恐珠玉留
君容千載不朽遭樊崇文章自足欺盲聾誰使一朝富
貴面發紅達人自達酒何功世間是非憂樂本來空

同年王中甫挽詞

先帝親收十五人四方爭看擊鵬鯢如君才業真堪用
顧我衰遲不足論出處陞沉十年後死生契闊幾人存

他時京口尋遺跡宿草猶應有淚痕

仁宗朝賢良十五人今惟富鄭公張

宣猷錢純老及余與舍弟在耳

七月五日二首

避謗詩尋醫畏病酒入務蕭條北窓下長日誰與度今年苦炎熱草木困薰煮况我早衰人幽居氣如縷秋來有佳興林稻已含露還復此微吟往和糟床注

何處覓新秋蕭然北臺上秋來未云幾風月已清亮雲間聳孤翠林表浮遠漲新棗漸堪剥晚瓜猶可餉西風

送落日萬竅含悽悵念當急行樂白髮不汝放

趙郎中見和戲復荅之

趙子吟詩如潑水一揮三百八十字奈何效我欲尋醫
恰似西施藏白地趙子飲酒如淋灰一年十萬八千杯
若不令君早入務飲竭東海生黃埃我衰臨政多繆錯
羨君精采如秋鶚頗哀老子今日飲為君坐嘯主畫諾

次韻周邠寄鴈蕩山圖二首

指點先憑採藥翁丹青化出大槐宮眼明小閣浮煙翠

齒冷新詩嚼雪風二華行觀雄陝右九仙今已壓京東
將赴河中密邇太華九仙在東武奇秀不減鴈蕩也此生的有尋山分已覺溫台

落手中

西湖三載與君同馬入塵埃鶴入籠東海獨來看出日
石橋先去踏長虹遙知別後添華髮時向樽前說病翁
所恨蜀山君未見他年攜手醉郛筒

送碧香酒與趙明叔教授

聞君有婦賢且廉勸君慎勿為楚相不羨紫駝分御食

自遣赤脚沽村釀嗟君老狂不知愧更吟醜婦惡嘲謗
諸生聞語定失笑冬暖號寒卧無帳碧香近出帝子家
鵝兒破殼酥流盎不學劉伶獨自飲一壺往助齊眉餉
趙既見和復次韻荅之

長安小吏天所放日夜歌呼和丞相豈知後世有阿瞞
曹公自言北海樽前捉私釀先生未出禁酒國詩語孤
參之後

高常近謗幾回無酒欲沽君却畏有司書簿帳

近制公使酒數

過法甚重酸寒可笑分一斗日飲亡何足表盎更將險語壓

衰翁只恐自是臺無餉

趙郎中往呂縣逾月而歸復以一壺遺之仍用

元韻

東隣主人遊不歸悲歌夜夜聞春相門前人開馬嘶急
一家喜氣如春釀王事何曾怨獨賢室人豈忍交謫謗
大兒踉蹌越門限小兒呶呶語繡帳定教舞袖掣伊涼
更想夜庖鳴鑿盎題詩送酒君勿誚免使退之嘲一餉

蘇潛聖挽詞

妙齡馳譽百夫雄晚節忘懷大隱中
惆悵無華真漢吏文章爾雅稱吾宗
趨時肯負平生志有子還應不死同
惟我閒思十年事數行老淚寄西風

東坡全集卷七

欽定四庫全書薈要卷一萬四千八百四十

集部

東坡全集卷八

宋 蘇軾 撰

詩七十二首

和晁同年九日見寄

仰看鸞鵠刺天飛
富貴功名老不思
病馬已無千里志
騷人長負一秋悲
古來重九皆如此
別後西湖付與誰
遣子窮愁天有意
吳中山水要清詩

送喬施州

恨無負郭田二頃空有載行書五車江上青山橫絕壁

雲間細路躡飛蛇雞號黑暗通蠻貨

胡人謂犀為黑暗

蜂鬧黃

連採蜜花共怪河南門下客不應萬里向長沙

喬受知於吳丞

相而施州風土大類長沙

夜雪獨宿柏山庵

晚雨纖纖變玉霏小庵高卧有餘清夢驚忽有穿窓片
夜靜惟聞瀉竹聲稍壓冬溫聊得健未濡秋旱若為耕
天公用意真難會又作春風爛漫晴

和孔郎中荆林馬上見寄

秋禾不滿眼宿麥種亦稀永愧此邦人芒刺在膚肌平
生五千卷一字不救饑方將怨無襦忽復歌緇衣堂堂
孔北海直氣凜群兒朱輪未及郊清風已先馳何以累
君子十萬貧與羸滔滔滿四方我行竟安之何時劍關
路春山聞子規

留別雩泉

舉酒屬雩泉白髮日夜新何時泉中天復照泉上人二

年飲泉水魚鳥亦相親
還將弄泉手遮日向西秦

留別釋迦院牡丹呈趙倅

春風小院却來時
壁間惟見使君詩
應問使君何處去
憑花說與春風知
年年歲歲何窮已
花似今年人老矣
去年崔護若重來
前度劉郎在千里

董儲郎中嘗知眉州
與先人遊過安丘訪其故
居見其子希甫留詩屋壁

白髮郎潛舊使君
至今人道最能文
隻雞敢忘橋公語

下馬來尋董相墳冬月負薪雖得免隣人吹笛不堪聞
死生契闊君休問灑淚西南向白雲

劉貢父見余歌詞數首以詩見戲聊次其韻

十載漂然未可期那堪重作看花詩門前惡語誰傳去
醉後狂歌自不知刺舌君今猶未戒炙眉我亦更何辭
相從痛飲無餘事正是春容最好時

除夜大雪留澠州元日早晴遂行中塗雪復作
除夜雪相留元日晴相送東風吹宿酒瘦馬兀殘夢葱

曉光開旋轉餘花弄下馬成野酌佳哉誰與共須臾
晚雲合亂灑無缺空鵝毛垂馬駿自怪騎白鳳三年東
方早逃戶連歆棟老農釋耒歎淚入饑腸痛春雪雖云
晚春麥猶可種敢怨行役勞助爾歌飯甕

大雪青州道上有懷東武園亭寄交代孔周翰
超然臺上雪城郭山川兩奇絕海風吹碎碧琉璃時見
三山白銀闕蓋公堂前雪綠窓朱戶相明滅堂中美人
雪爭妍粲然一笑玉齒頰就中山堂雪更奇青松怪石

亂瓊絲惟有使君遊不歸五更上馬愁歛眉君不見淮
西李侍中夜入蔡州縛取吳元濟又不見襄陽孟浩然
長安道上騎驢吟雪詩何當閉門飲美酒無人毀譽河
東守

至濟南李公擇以詩相迎次其韻二首

弊裘羸馬古河濱野闊天低糝玉塵自笑餐氈典屬國
來看換酒謫仙人宦遊到處身如寄農事何時手自親
剡作新詩與君和莫因風雨廢鳴晨

夜擁笙歌雪水濱
回頭樂事總成塵
今年送汝作太守
到處逢君是主人
聚散細思都是夢
身名漸覺兩非親
相從繼燭何煩問
蝙蝠飛時日正晨

和孔君亮郎中見贈

偶對先生盡一樽
醉看萬物汎崩奔
優遊共我聊卒歲
骯髒如君合倚門
只恐掉頭難久住
應須傾蓋便深論
固知嚴勝風流在
又見長身十世孫

幾字君嚴戡字君勝退之志其墓云

孔子世三十八
吾見其孫白而長
身今君亮四十八
世矣

送范景仁遊洛中

小人真闇事閒退
宣公難道大吾何病
言深聽者寒憂
時雖早白住世有還丹
得酒相逢樂無心所遇安
去年行萬里蜀路走千盤
投老身彌健登山意未闌
西遊為櫻筍東道盡鵲鸞
杖屨携兒去園亭借客看
折花斑竹寺弄水石樓灘
鬻馬衰憐白驚雷怯笑韓
蘇書標洞府歐陽永叔嘗遊嵩山日莫於絕壁上見松蓋偃天壇
試苔蘇成文云神清之洞明日復尋不見松蓋偃天壇試
與劉夫子重尋靖長官

劉几云曾見人嵩山幽絕處
眼光如貓意其為靖長官也

次韻景仁留別

公老我亦衰相見恨不數臨行一盃酒此意重山岳歌
詞白紵清琴弄黃鍾濁詩新眇難和飲少僅可學欲參
兵部選有力誰如犖且作東諸侯山城雄鼓角南遊許
過我不憚千里邈會當聞公來倒屣髮一握

書韓幹牧馬圖

南山之下汧渭之間想見開元天寶年八坊分屯隘秦
川四十萬疋如雲烟騅駟駟驪騄驄白魚赤兔騂皇駟

龍顙鳳頸獰且妍
竒姿逸德隱驚頑
碧眼胡兒手足鮮
歲時翦刷供帝閑
柘袍臨池侍三千
紅粧照日光流淵
樓下玉螭吐清寒
往來蹙蹙生飛湍
衆工舐筆和朱鉛
先生曹霸弟子韓
厖馬多肉尻雕圓
肉中畫骨誇尤難
金羈玉勒繡羅鞍
鞭箠刻烙傷天全
不如此圖近自然
平沙細草荒芊綿
驚鴻脫兔爭後先
王良挾策飛上天
何必俯首服短轡

送魯元翰少卿知衛州

冗士無處著寄身范公園桃花忽成陰薺麥秀已繁閉
門春晝永惟有黃蜂喧誰人肯攜酒共醉榆柳村髯卿
獨何者一月三到門我不往拜之髯來意彌敦堂堂元
老後亶亶仁人言憶在錢塘歲情好均弟昆時於冰雪
中笑語作春溫欲飲徑相覓夜開叢竹軒搜尋到篋笥
鮓醢無復存每愧煙火中玉腕親炮燂別來今幾何相
對如夢魂告我當北渡新詩侑清樽坡陀太行麓洶涌
黃河翻仕宦非不遇王畿西北垣斯民如魚耳見網則

驚奔皎皎千丈清不如尺水渾刑政雖首務念當養其
源一聞襦袴音盜賊安足論

次韻子由送蔣夔赴代州學官

功利爭先變法初典刑獨守老成餘窮人未信詩能爾
倚市懸知繡不如代北諸生漸狂簡床頭雜說為爬梳
歸來問鴈吾何敢疾世王符解著書

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟

龍睡足亦解慙二麥枯時雨如洗不知雨從何處來但
聞呂梁百步聲如雷試上城南望城北際天菽粟青成
堆饑火燒腸作牛吼不知待得秋成否半年不語坐龍
慵共怨天公不怨龍今朝一雨聊自贖龍神社鬼各言
功無功日盜太倉穀嗟我與龍同此責勸農使者不汝
容因君作詩先自劾

宿州次韻劉涇

我欲歸休瑟漸希舞雩何日著春衣多情白髮三千丈

無用蒼皮四十圍晚覺文章真小技
早知富貴有危機
為君垂涕君知否千古華亭鶴自飛

涇之兄汴亦有文死矣

和孔密州五絕

見邱家園留題

大旆傳聞載酒過小詩未忍著塲磨
陽關三疊君須秘
除却膠西不解歌

來詩有渭城之句

春步西園見寄

歲歲開園成故事年年行樂不辜春
今年太守尤難繼

慈愛聰明惠利人

東欄梨花

梨花淡白柳深青
柳絮飛時花滿城
惆悵東欄二株雪
人生看得幾清明

和流杯石上草書小詩

蜂腰鶴膝嘲希逸
春蚓秋蛇病子雲
醉裏自書醒自笑
如今二絕更逢君

堂後白牡丹

城西千葉豈不好笑舞春風醉臉丹何似後堂冰玉潔
遊蜂非意不相干

孔頗有聲伎而客無見者

和趙郎中見戲

趙以徐伎不如東武詩中見戲云只有當時燕子樓

燕子人亡三百秋
卷簾那復似揚州
西行未必能勝此
空唱崔徽上白樓

又

我擊藤床君唱歌
明年六十柰君何
醉顛只要裝風景

莫向人前自洗磨

趙每醉歌畢輒曰明年六十矣

和子由與顏長道同遊百步洪相地築亭種柳
平明坐衙不暖席歸來閉閣閒終日卧聞客至倒屣迎
兩眼蒙籠餘睡色城東泗水步可到路轉河洪翻雪白
安得青絲絡駿馬蹙踏飛波柳陰下奮身三丈兩蹄間
振鬣長鳴身自乾少年狂興久已謝但憶嘉陵遶劍關
劍關大道車方軌君自不去歸何難山中故人應大笑
築室種柳何時還

次韻李邦直感舊

騶騎傳呼出跨坊簿書填委入充堂誰教按部如何武
只許清樽對孟光婉婉有時來入夢溫柔何日聽還鄉
酸寒病守尤堪笑千步空餘僕射場

與梁先舒煥泛舟得臨釀字二首

彭城古戰國孤客勸登臨汴泗交流處清潭百丈深故
人輕千里足蠶來相尋何以娛佳客潭水洗君心

老守厭簿書先生罷函丈風流魏晉間談笑羲皇上河
洪忽已過水色綠可釀君毋輕此樂此樂清且放

次韻荅邦直子由四首

簿書顛倒夢魂間，知我踈慵肯見原。
閒作閉門僧舍冷，病聞吹枕海濤喧。
忘懷杯酒逢人共，引睡文書信手翻。
欲吐狂言喙三尺，怕君瞋我却須吞。

邦直屢以此見戒

城南短李好交遊，箕踞狂歌總自由。
尊主庇民君有道，樂天知命我無憂。
醉呼妙舞流連夜，閒作清詩斷送秋。
瀟灑使君殊不俗，罇前容我攬須不。

老弟東來殊寂寞，故人留飲慰酸寒。
艸荒城角開新徑，

雨入河洪失舊灘車馬追陪迹未掃唱酬往復字應漫
此詩更欲憑君改待與江南子布看

君雖為我此遲留別後淒涼我已憂不見便同千里遠
退歸終作十年遊恨無揚子一區宅懶卧元龍百尺樓
聞道鵷鴻滿臺閣網羅應不到沙鷗

司馬君實獨樂園

青山在屋上流水在屋下中有五畝園花竹秀而野花
香襲杖屨竹色侵盞斚樽酒樂餘春若局消長夏洛陽

古多士風俗猶爾雅先生卧不出冠蓋傾洛社雖云與
衆樂中有獨樂者才全德不形所貴知我寡先生獨何
事四海望陶冶兒童誦君實走卒知司馬持此欲安歸
造物不我捨名聲逐吾輩此病天所赭撫掌笑先生年
來效瘖啞

送顏復兼寄王鞏

彭城官居冷如水誰從我遊顏氏子我衰且病君亦窮
衰窮相守正其理胡為一朝捨我去輕衫觸熱行千里

問君無乃求之歟
荅我不然聊爾耳
京師萬事日日新
故人如故今有幾
君知牛行相君宅
扣門但覓王居士
清詩草聖俱入妙
別後寄我書連紙
苦恨相思不相見
約我重陽嗅霜藥
君歸可喚與俱來
未應指目妨進擬
太一老仙閒不出
張安道為
太一宮使踵門問道
今時矣因行過
我路幾何願君推
挽加鞭箠吾儕一
醉豈易得買羊釀
酒從今始

蠍虎

黃雞啄蠍如啄黍窓間守宮稱蠍虎閣中繳尾伺飛蟲
巧捷功夫在腰脅跂跂脉脉善緣壁陋質從來誰比數
今年歲旱號蜥蜴狂走兒童鬧歌舞能銜渠水作冰雹
便向蛟龍覓雲雨守宮努力搏蒼蠅明年歲旱當求汝

轍幼從子瞻兄讀書未嘗一日相舍旣壯將遊

宦四方讀韋蘇州詩有云那知風雨夜復此對
床眠惻然感之乃相約早退為閒居之樂故子
瞻始為鳳翔幕官留詩與轍曰夜雨何時聽蕭

瑟其後子瞻通守餘杭復移守膠西而輟滯
留於淮陽濟南不見者七年熙寧十年二月
始復會於澶濮之間相從彭城留百餘日時
宿於逍遙堂追感前約作二小詩

逍遙堂後千尋木長送中宵風雨聲
誤喜對床尋舊約不知漂泊在彭城

秋來東閣涼如水客至山公醉似泥
困卧北窓呼不醒風吹松竹雨淒淒

子由將赴南都與余會宿於逍遙堂作兩絕句
讀之殆不可為懷因和其詩以自解余觀子
由自少曠達天資近道又得至人養生長年
之訣而余亦竊聞其一二以為今者宦遊相
別之日淺而異時退休相從之日長既以自
解且以慰子由云

別期漸近不堪聞風雨蕭蕭已斷魂
猶勝相逢不相識
形容變盡語音存

但令朱雀長金花此別還同一轉車五百年間誰復在
會看銅狄兩咨嗟

留題石經院三首

慈清門前路行穿翠窰中却來堂上看巖谷意無窮
天矯庭中檜枯枝鵲踏消瘦皮纏鶴骨高頂轉龍腰
窈窕山頭井潛通伏澗清欲知深幾許聽放轆轤聲

過雲龍山人張天驥

郊原雨初足風日清且好病守亦欣然肩輿白門道荒

田咽蛩蚓村巷懸黎棗下有幽人居閉門空雀噪西風
高正厲落葉紛可掃孤僮卧斜日病馬放秋草墟里通
有無垣墻任摧倒君家本冠蓋絲竹開隣保脫身聲利
中道德自濯澡躬耕抱羸疾奉養百歲老詩書膏吻頰
菽水媚翁媪饑寒天隨子杞菊自撷毛慈孝董邵南雞
狗相乳抱吾生如寄耳歸計失不早故山豈敢忘但恐
迫華皓從君學種秫斗酒時相勞

贈王仲素寺丞

名景純

養氣如養兒棄官如棄泥人皆笑子拙事定竟誰迷歸
耕獨患貧問子何所齎尺宅足自庇寸田有餘畦明珠
照短褐陋室生虹霓雖無孔方兄頗有法喜妻彈琴一
長嘯不答阮與嵇曹南劉夫子名與子政齊家有鴻寶
書不鑄金裘蹄促膝問道要遂蒙分刀圭不忍獨不死
尺書肯見梯我生本強鄙少以氣自擠孤舟倒江河赤
手攬象犀年來稍自笑留氣下暖臍苦恨聞道晚意象
颯已淒空見孫思邈區區賦病梨

陽關詞三首

受降城下紫髯郎戲馬臺南古戰場恨君不取契丹首
金甲牙旗歸故鄉

右贈張繼愿

濟南春好雪初晴行到龍山馬足輕使君莫忘雪溪女
時作陽關腸斷聲

右荅李公擇

暮雲收盡溢清寒銀漢無聲轉玉盤此生此夜不長好

明月明年何處看

右中秋月

和孔周翰二絕

再觀邸園留題

小園香霧曉蒙籠
醉手狂詞未必工
魯叟錄詩應有取
曲收彤管卽鄜風

觀淨觀堂效韋蘇州詩

弱羽巢林在一枝
幽人蝸舍兩相宜
樂天長短三千首

却愛韋郎五字詩

京師哭任遵聖

十年不還鄉兒女日夜長豈惟催老大漸復成凋喪每
聞耆舊亡涕泣聲輒放老任況竒逸先子推輩行文章
小得譽詩語尤清壯吏能復所長談笑萬夫上自喜作
劇縣偏工破豪黨奮髯走滑吏嚼齒對姦將哀哉命不
偶每以才得謗竟使落窮山青衫就黃壤宦遊久不樂
江海永相望退耕本就君時節相勞餉此懷今不遂歸

見累累塋望哭國西門落日銜千嶂平生惟一子抱負
珠在掌見之齧齧中已有食牛量他年如入洛生死一
相訪惟有王濬冲心知中散狀

答任師中家漢公

先君昔未仕杜門皇祐初道德無貧賤風采照鄉閭何
嘗踈小人小人自闊踈出門無所詣老史在郊墟門前
萬竿竹堂上四庫書高樹紅消梨小池白芙蓉常呼赤
脚婢雨中擷園蔬矯矯任夫子罷官還舊廬是時里中

兒始識長者車烹雞酌白酒相對歡有餘有如龐德公

往還葛與徐妻子走堂下主人竟誰歟我時年尚幼作

賦慕相如侍立看君談精悍實起予歲月曾幾何耆老

逝不居史侯最先沒孤墳拱桑樗我亦涉萬里清血滿

襟袂漂流二十年始悟萬緣虛獨喜任夫子老佩刺史

魚威行烏白蠻解辦請冠裾方當入奏事清廟陳璠璣

胡為厭軒冕歸意不少紓上蔡有良田黃沙走清渠罷

亞百頃稻雍容十年儲閑隨李丞相搏射鹿與猪蒼鷹

十斤重猛犬如黃驢豈比陶淵明窮苦自把鋤我今四
十二衰髮不滿梳彭城古名郡乏人偶見除頭顱已可
知幾何不樵漁會當相從去芒鞋老菑畬念子瘴江邊
懷抱向誰攄賴我同年友相歡出同輿冰盤薦文鮪
也戎瀛玉笋傾浮蛆醉中忽思我清詩綴瓊琚知我少
常有
誼諧教我時卷舒世事日反覆翩如風中旟崔羅弔廷
尉秋扇悲婕妤好升沉一何速喜怒紛衆狙作詩謝二子
我師甯與蘧

初別子由

我少知子由天資和而清好學老益堅表裏漸融明豈
獨為吾弟要是賢友生不見六七年微言誰與賡常恐
坦率性放縱不自程會合亦何事無言對空枰使人之
意消不善無由萌森然有六女包裹布與荆無憂賴賢
婦藜藿等大烹使子得行意青衫陋公卿明日無晨炊
倒床作雷鳴秋眠我東閣夜聽風雨聲懸知不久別妙
理重細評昨日忽出門孤舟轉西城歸來北堂上古屋

空崢嶸退食悞相從入門中自驚南都信繁會人事水火爭念當閑閣坐頽然寄聲盲妻子亦細事文章固虛名會須掃白髮不復用黃精

次韻呂梁仲屯田

雨葉風花日夜稀一杯相屬竟何時空虛豈敢酬瓊玉枯朽猶能出茵芝門外呂梁從迅急胸中雲夢自逶遲待君筆力追靈運莫負南臺九日期

章質夫寄惠崔徽真

玉釵半脫雲垂耳
亭亭芙蓉在秋水
當時薄命一酸辛
千古華堂奉君子
水邊何處無麗人
近前試看丞相嗔
不如丹青不解語
世間言語元非真
知君被惱更愁絕
卷贈老夫驚老拙
為君援筆賦梅花
未害廣平心似鐵
王鞏屢約重九見
訪既而不至以詩送將官梁
交且見寄次韻答之交頗文雅不類武人家
有侍者甚惠麗

知君月下見傾城
破恨懸知酒有兵
老守無何惟日飲

將軍競病自詩鳴
花枝不共秋歌帽
筆陣空來夜斫營
愛惜微官將底用
他年只好寫銘旌

臺頭寺雨中送李邦直赴史館分韻得憶字人
字兼寄孫巨源二首

霜林日夜西風急
老送君歸百憂集
清歌窈眇入行雲
雲為不行天為泣
紅葉黃花秋正亂
白魚紫蟹君須憶
憑君說向髯將軍
衰髮相逢應不識

珥筆西歸近紫宸
太平典冊不緣麟
付君此事寧論晉

載我當時舊過秦門外想無千斛米墓中知有百年人
看君兩眼明如鏡休把春秋坐素臣

代書答梁先

此身與世真悠悠蒼顏華髮誰汝留強名太守古徐州
忘歸不如楚沐猴魯人豈獨不知丘藉蹲夫子無罪尤
異哉梁子清而脩不遠千里從我遊瞭然正色懸雙眸
世之所馳子獨不一經通明傳節侯小楷精絕規摹歐
梁生學歐我衰廢學懶且媿畏見問事賈長頭別來紅
陽公書

葉黃花秋夜夢見之起坐愁遺我駁石盆與甌黑質白
章聲琳球謂言山石生澗溝追琢尚可王公羞感子佳
意能無酬反將木瓜報珍投學如富賈在博收仰取俯
拾無遺籌道大如天不可求脩其可見致其幽願子篤
實慎勿浮發憤忘食樂忘憂

九日邀仲屯田為大水所隔以詩見寄次其韻

無復龍山對孟嘉西來河伯意雄夸霜風可使吹黃帽
舟人黃帽土勝水也尊酒那能泛浪花謾遣鯉魚傳尺素却將燕

石報瓊華何時得見悲秋老醉裏題詩字半斜

河復并叙

熙寧十年秋河決澶淵注鉅野入淮泗自澶魏以北皆
絕流而濟楚大被其害彭門城下水二丈八尺七十餘
日不退吏民疲於守禦十月十三日澶州大風終日既
止而河流一枝已復故道聞之喜甚庶幾可塞乎乃作
河復詩歌之道路以致民願而迎神休蓋守土者之志
也

君不見西漢元光元封間河決瓠子二十年鉅野東傾
淮泗滿楚人恣食黃河鱸萬里沙回封禪罷初遣越巫
沉白馬河工未許人力窮薪芻萬計隨流下吾君仁聖
如帝堯百神受職河神驕帝遣風師下約束北流夜起
澶州橋東風吹凍收微涿神功不用淇園竹楚人種麥
滿河淤仰看浮槎棲古木

韓幹馬十四疋

二馬並驅攢八蹄二馬宛頸駿尾齊一馬任前雙舉後

一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俯啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓
此詩此畫誰當省

有言郡東北荆山下可以溝畎積水因與吳正
字王戶曹同往相視以地多亂石不果還遊
聖女山山有石室如墓而無棺槨或云宋司

馬桓魋墓二子有詩次其韻二首

側手區區未易遮奔流一瞬卷千家共疑智伯初圍趙
猶有張湯欲漕斜已坐迂疎來此地分將勞苦送生涯
使君下策真堪笑隱隱驚雷響踏車

茫茫清泗遠孤岑歸路相將得暫臨試著芒鞋穿犖确
更然松炬照幽深縱令司馬能鑱石柰有中郎解摸金
強寫蒼崖留歲月他年誰識此時心

贈寫御容妙善師

憶昔射策干先皇珠簾翠幄分兩廂紫衣中使下傳詔跪
捧再拜聞天香仰觀眩晃目生暈但見曉色開扶桑迎陽
晚出步就坐絳紗玉斧光照廊野人不識日月角髣髴尚
記重瞳光三年歸來真一夢橋山松檜淒風霜天容玉色
誰敢畫老師古寺晝閉房夢中神授心有得覺來信手筆
已忘幅巾常服儼不動孤臣入門涕自滂元老侑坐須眉
古虎臣立侍冠劔長平生慣寫龍鳳質肯顧草間猿與麋
都人踏破鐵門限黃金白壁空堆床爾來摹寫亦到我謂

是先帝白髮郎不須覽鏡坐自了明年乞身歸故鄉

哭刁景純

讀書想前輩每恨生不早紛紛少年場猶得見此老此
老如松栢不受霜雪槁直從毫末中自養到合抱宏材
乏近用千歲自枯倒文章餘正始風節貫華皓平生為
人耳自為薄如縞是非雖難齊反覆看愈好前年旅吳
越把酒慶壽考扣門無晨夜百過迹未掃但知從德公
未省厭丘嫂別時公八十後會知難保昨日故人書連

年喪公媼

景純妻先亡

傷心范橋水漾漾舞寒藻華堂不見

人瘦馬空戀阜我欲江東去匏樽酌行潦鏡湖無賀監
慟哭稽山道忍見萬松岡荒池沒秋草

答呂梁仲屯田

亂山合沓圍彭門官居獨在懸水村

呂梁地名

居民蕭條雜

麋鹿小市冷落無雞豚黃河西來初不覺但訝清泗流
奔渾夜聞沙岸鳴壑壑曉看雪浪浮鵬鯢呂梁自古嘆
吻地萬頃一抹何由吞坐觀入市卷閭井吏民走盡餘

王尊計窮路斷欲安適吟詩破屋愁鳶蹲歲寒霜重水
歸壑但見屋瓦留沙痕入城相對如夢寐我亦僅免為
魚黿旋呼歌舞雜謔笑不惜飲醕空斟盆念君官舍冰
雪冷新詩美酒聊相溫人生如寄何不樂任使絳蠅燒
黃昏宣房未築淮泗滿故道堙滅瘡痍存明年勞苦應
更甚我當畚鍤先黥髡付君萬指伐頑石千絕雷動蒼
山根高城如鐵洪口決談笑却掃看崩奔農夫掉臂免
狼顧秋穀布野如雲屯還須更置軟脚酒為君擊鼓行

金樽

張寺丞益齋

張子作齋舍而以益為名吾聞之夫子求益非速成譬如遠遊客日夜事征行今年適燕薊明年走蠻荆東觀盡滄海西涉渭與涇歸來閉戶坐八方在軒庭又如學醫人識病由飽更風雨晦明淫跛蹙瘡聾盲虛實在其脉靜躁在其情榮枯在其色壽夭在其形苟能閱千人望見知死生為學務日益此言當自程為道貴日損此

理在既盈願君書此詩以為益齋銘

答孔周翰求書與詩

身閒曷不長閉口天寒正好深藏手吟詩寫字有底忙
未脫多生宿塵垢不蒙譏訶子厚疾反更刻畫無鹽醜
征西自有家雞肥太白應驚飯山瘦與君相從知幾日
東風待得花開否撥棄萬事勿復談百觚之後那辭酒
送李公恕赴闕

君才有如切玉刀見之凜凜寒生毛願隨壯士斬蛟蜃

不顧腰間纏綿條用違其才志不展坐與胥吏同疲勞
忽然眉上有黃氣吾君漸欲收英髦立談左右俱動色
一語徑破千言牢我頃分符在東武脫略萬事惟嬉遨
盡壞屏障通內外仍呼騎曹為馬曹君為使者見不問
反更對飲持雙螯酒酣箕坐語驚衆雜以嘲諷窮詩騷
世上小兒多忌諱獨能容我真賢豪為我買田臨汶水
逝將歸去誅蓬蒿安能終老塵土下俯仰隨人如桔槔

東坡全集卷八

謹案卷七第一頁後七行率以一升完一畝刊本

升訛勝據施本改

第四頁後六行穆然濯微涼按施本濯作中箋引

宋玉薄寒中人句

第九頁前一行葦閒自延緣刊本延訛寅據施本
改

第十六頁後七行金橙徑按施本金作香

第十八頁前八行和潞公超然臺次韻刊本次訛

收今改

第十九頁前七行皆道吳中饑苦之狀刊本訛有
道失中饑之事據施本改

第二十三頁後八行日飲如何足袁盎按施本如
作亡


第二十四頁前四行悲歌夜夜聞春相刊本春訛
椿據施本改

卷八第二頁前二行芒刺在膚肌刊本肌訛饑今

改

第五頁後五行倒屣髮一握刊本屣訛屣據施本


改



總校官庶吉士臣張能照

校對官庶吉士臣陳文樞

謄錄監生臣呂燕昭



欽定四庫全書叢要

集部

東坡全集卷九

十



詳校官助教臣常循

欽定四庫全書薈要卷一萬四千八百四十一


集部

東坡全集卷九

宋 蘇軾 撰

詩六十七首

春菜


宿根已生葉
菲芽戴土拳
如蕨爛蒸香
薺白魚肥
碎點青蒿涼
餅滑宿酒初
消春睡起細
履幽畦掇芳
辣
茵陳甘菊不
負渠繪縷堆
盤纖手抹北
方苦寒今未
已
雪底菠薐如
鐵甲豈如吾
蜀富冬蔬霜
葉露芽寒更
茁

久拋菰葛猶細事苦筍江豚那忍說明年投劾徑須歸
莫待齒搖并髮脫

送鄭戶曹

游遍錢塘湖上山歸來文字帶芳鮮羸僮瘦馬從吾飲
陋巷何人似子賢公業有田常乏食廣文好客竟無氈
東歸不趁花時節開盡春風誰與妍

虔州八境圖八首

坐看奔湍遶石樓使君高會百無憂三屏竊鄙秦太守

八詠聊同沈隱侯

濤頭寂寞打城還
章貢臺前暮靄寒
勸客登臨無限思
孤雲落日是長安

白鵲樓前翠作堆
縈雲領路若為開
故人應在千山外
不寄梅花遠信來

朱樓深處日微明
皂蓋歸時酒半醒
薄暮漁樵人去盡
碧溪青嶂遶螺亭

使君那暇日參禪
一望叢林一悵然
成佛莫教靈運後

看鞭從使祖生先

却從塵外望塵中無限樓臺煙雨濛
山水照人迷向背只尋孤塔認西東

煙雲縹眇鬱孤臺積翠浮空雨半開
想見之罍觀海市絳宮明滅是蓬萊

回峰亂嶂鬱參差雲外高人世得知
誰向空山弄明月山中木客解吟詩

讀孟郊詩二首

夜讀孟郊詩細字如牛毛寒燈照昏花佳處時一遭孤
芳擢荒穢苦語餘詩騷水清石鑿鑿湍激不受篙初如
食小魚所得不償勞又似煮彭蠡竟日嚼空螯要當關
僧清未足當韓豪人生如朝露日夜火消膏何苦將兩
耳聽此寒蟲號不如且置之飲我玉卮醪

我憎孟郊詩復作孟郊語饑腸自鳴喚空壁轉饑鼠詩
從肺腑出出輒愁肺腑有如黃河魚出膏以自煮尚愛
銅斗歌鄙俚頗近古桃弓射鴨罷獨速短蓑舞不憂踏

船翻踏浪不踏土吳姬霜雪白赤脚浣白紵嫁與踏浪兒不識離別苦歌君江湖曲感我長羈旅

訪張山人得山中字二首

魚龍隨水落猿鶴喜君還舊隱丘墟外新堂紫翠間野

麋馴杖屨幽桂出榛菅洒掃門前路山公亦愛山

張故居為

大水所壞新卜此室故居之東

萬木鎖雲龍

山名

天留與戴公路迷山向背人在瀼西東

薺麥餘春雪櫻桃落晚風入城都不記歸路醉眠中

送孔郎中赴陝郡

驚風擊面黃沙走西出嶠函脫塵垢使君来自古徐州
聲震河潼殷關右十里長亭聞鼓角一川秀色明花柳
北臨飛檻卷黃流南望青山如峴首東風吹開錦繡谷
淶水翻動蒲萄酒訟庭生草數開樽過客如雲牢閉口

與梁左藏會飲傅國博家

將軍破賊自草檄論詩說劒俱第一彭城老守本虛名
識字劣能欺項籍風流別駕貴公子欲把笙歌暖鋒鏑

紅旆朝開猛士噪翠帷暮卷佳人出東堂醉卧呼不起
啼鳥落花春寂寂試教長笛傍耳根一聲吹裂堦前石

寒食日谷公擇三絕次韻

從來蘇李得名雙只恐全齊笑陋邦詩似懸河供不辦
故欺張籍隴頭隴

簿書鑿鼓不知春佳句相呼賴故人寒食德公方上冢
歸來誰主復誰賓

巡城已困塵埃昧執朴仍遭蟻黠緣欲脫布衫攜素手

試開病眼點黃連

來詩謂僕布衫督役

約公擇飲是日大風

先生生長匡廬山山中讀書三十年舊聞飲水師顏淵
不知治劇乃所便偷兒夜探赤白丸奮髯忽逢朱子元
半年羣盜誅七百誰信家書藏九千春風無事秋月閒
紅粧執樂豪且妍紫衫玉帶兩部全琵琶一抹四十絃
客來留飲不計錢齊人愛公如子產兒啼卧路呼不還
我慙山郡空留連牙兵部吏笑我寒邀公飲酒公無難

約東官奴買花鈿薰衣理髮夜不眠曉來顛風塵暗天
我思其由豈坐慙作詩愧謝公笑謹歸來瑟縮愈不安
要當啖公八百里豪氣一洗儒生酸

座上賦戴花得天字

清明初過酒闌珊折得奇葩晚更妍春色豈關吾輩事
老狂聊作座中先醉吟不耐歌紗帽起舞從教落酒船
結習漸消留不住却須還與散花天

夜飲次韻畢推官

簿書叢裏過春風酒聖時時且復中紅燭照庭嘶腰裏
黃雞催曉唱玲瓏老來漸減金釵興醉後空驚玉筋工
月未上時應早散免教壑谷問吾公

續麗人行

李仲謀家有周昉畫背面欠伸內人極精戲
作此詩

深宮無人春日長沉香亭北百花香美人睡起薄梳洗
燕舞鶯啼空斷腸畫工欲畫無窮意背立東風初破睡

若教回首却嫣然陽城下蔡俱風靡杜陵饑客眼長寒
蹇驢破帽隨金鞍隔花臨水時一見只許腰支背後看
心醉歸來茅屋底方信人間有西子君不見孟光舉案
與眉齊何曾背面傷春啼

聞李公擇飲傅國博家大醉二首

兒童拍手鬧黃昏應笑山公醉習園縱使先生能一石
主人未肯獨留髡

不肯惺惺騎馬迴玉山知為玉人頽紫雲有語君知否

莫喚分司御史來

起伏龍行 并敘

徐州城東二十里有石潭父老云與泗水通增損清濁
相應不差時有河魚出焉元豐元年春旱或云置虎頭
潭中可以致雷雨用其說作起伏龍行一首

何年白竹千鈞弩射殺南山雪毛虎至今顱骨帶霜牙
尚作四海毛蟲祖東方久旱千里赤三月行人口生土
碧潭近在古城東神物所蟠誰敢侮上歌蒼石擁巖竇

下應清河通水府眼光作電走金蛇鼻息為雲擢煙縷
當年負圖傳帝命左右羲軒詔神禹爾來懷寶但貪眠
滿腹雷霆瘡不吐赤龍白虎戰明日
是月丙辰
明日庚寅倒卷黃
河作飛雨嗟吾豈樂闕兩雄有事徑須煩一怒

聞公擇過雲龍張山人輒往從之公擇有詩戲
用其韻

我生固多憂肉食常苦墨軒然就一笑猶得好飲力聞
君過雲龍對酒兩靜默急携清歌女出郭及未晡一歡

難力致邂逅有勝特喧蜂集晚花亂雀啁叢棘山人樂
此耳寂寞誰侍側何當求好人聊使治要襍使君自孤
憤此理誰相直不如學養生一氣服千息

送李公擇

嗟余寡兄弟四海一子由故人雖云多出處不我謀弓
車無停招逝去勢莫留僅存今幾人各在天一隅有如
長庚月到曉爛不收宜我與夫子相好手足侔比年兩
見之賓主更獻酬樂哉十日飲衍衍和不流論事到深

夜僵仆鈴與騶頗嘗見使君有客如此不欲別不忍言
慘慘集百憂念我野夫兄知名三十秋已得其為人不
待風馬牛他年林下見傾蓋如白頭

送荀芍藥與公擇二首

久客厭虜饌

蜀人謂東北人虜子

枵然思南烹故人知我意千里

寄竹萌駢頭玉嬰兒一一脫錦裯庖人應未識旅人眼
先明我家拙厨膳羝肉芼蕪菁送與江南客燒煮配香

粳

今日忽不樂折盡園中花園中亦何有芍藥裊殘葩久
早復遭雨紛披亂泥沙不折亦安用折去還可嗟棄擲
亮未能送與謫仙家還將一枝春揷向兩髻了

和孫莘老次韻

去國光陰春雪消還家蹤跡野雲飄功名正自妨行樂
迎送纔堪博早朝雖去友朋親吏卒却辭讒謗得風謠
明年我亦江東去不問繁華與寂寥

游張山人園

壁間一軸煙蘿子
盆裏千枝錦被堆
慣與先生為酒伴
不嫌刺史亦顏開
纖纖入麥黃
花亂颯颯催
詩白雨來
聞道君家好井水
歸軒乞得滿鉶回

杜介熙熙堂

崎嶇世路最先回
窈窕華堂手自開
咄咄何曾書怪事
熙熙長覺似春臺
白砂碧玉味方永
黃紙紅旗心已灰
遙想閑門投轄飲
鵬絃鐵撥響如雷

次韻荅劉涇

吟詩莫作秋蟲聲天公怪汝鈎物情使汝未老華髮生
芝蘭得雨蔚青青何用自燔以出馨細書千紙雜真行
新音百變口如鶩異議蜂起弟子爭舌翻濤瀾卷齊城
萬卷堆胸兀相撐以病為樂子未驚我有至味非煎烹
是中之樂吁難名綠槐如山閭廣庭飛蟲繞耳細而清
敗席展轉卧看經亦自不嫌翠織成意行信足無溝坑
不識五郎呼作卿吏民哀我老不明相戒毋復煩鞭刑
時臨泗水照星星微風不起鏡面平安得一舟如葉輕

卧聞郵籤報水程
尊羹羊酪不須評
一飽且救饑腸鳴
携妓樂游張山人園

大杏金黃小麥熟
墮巢乳鵲拳新竹
故將俗物惱幽人
細馬紅粧滿山谷
提壺勸酒意雖重
杜鵑催歸聲更速
酒闌人散却關門
寂歷斜陽挂疎木

種德亭

并敘

處士王復家於錢塘
為人多技能而醫尤精
期於活人而已
不志於利
築室候潮門外
治園圃作亭榭
以與賢

士大夫游惟恐不及然終無所求人徒知其接花藝果之勤而不知其所種者德也乃以名其亭而作詩以遺之

小圃旁城郭閉門芝朮香名隨市人隱德與佳木長元
化善養性倉公多禁方所活不可數相逢旋相忘但喜
賓客來置酒花滿堂我欲東南去再觀雙檜蒼山茶想
出屋湖橘應過墻木老德亦熟吾言豈荒唐

文與可有詩見寄云待將一段鵝溪絹掃取寒

稍萬尺長次韻答之

為愛鵝溪白
靈光掃殘雞
距紫毫銍世間那有千尋竹
月落庭空影許長

聞辯才法師復歸上天竺以詩戲問

道人出山去
山色如死灰
白雲不解笑
青松有餘哀
忽聞道人歸
鳥語山容開
神光出寶髻
法雨洗浮埃
想見南北山
花發前後臺
寄聲問道人
借禪以為誨
何所聞而去
何所見而回
道人笑不答
此意安在哉
昔年本不

住今者亦無來此語竟非是且食白楊梅

和子由送將官梁左藏仲通

雨足誰言春麥短城堅不怕秋濤卷日長惟有睡相宜
半脫紗巾落紈扇芳草不鋤當戶長珍禽獨下無人見
覺來身世都是夢坐久枕痕猶著面城西忽報故人来
急掃風軒炊麥飯

徐州所出

伏波論兵初矍鑠中散談仙更

清遠南都從事亦學道不卹腸空誇腦滿問羊他日到

金華應許相將游閬苑

黃初平之兄尋其弟於金華山

次韻秦觀秀才見贈秦與孫莘老李公擇甚熟
將入京應舉

夜光明月非所投逢年遇合百無憂將軍百戰竟不侯
伯郎一斗得涼州翹關負重君無力十年不入紛華域
故人坐上見君文謂是古人吁莫測新詩說盡萬物情
硬黃小字臨黃庭故人已去君未到空吟河畔草青青
誰謂他鄉各異縣天遣君來破吾願一聞君語識君心
短李髯孫眼中見江湖放浪久全真忽然一鳴驚倒人

從橫所值無不可知君不怕新書新千金弊帚那堪換
我亦淹留豈長筭山中既未決同歸我聊爾耳君其漫
僕曩於長安陳漢卿家見吳道子畫佛碎爛可
惜其後十餘年復見之於鮮于子駿家則已
裝背完好子駿以見遺作詩謝之

貴人金多身復閒爭買書畫不計錢已將鐵石充逸少

殷鐵石梁武帝時人今法帖大王書中有鐵石字

更補朱繇為道玄

世所收吳畫多朱繇

也筆煙熏屋漏裝玉軸鹿皮蒼壁知誰賢吳生畫佛本神

授夢中化作飛空僊覺來落筆不經意神妙獨到秋毫
顛我昔長安見此畫歎息至寶空潜然素絲斷續不忍
看已作胡蝶飛聯翩君能收拾為補綴體質散落嗟神
全誌公髣髴見刀尺脩羅天女猶雄妍如觀老杜飛鳥
句脫字欲補知無緣問君乞得良有意欲將俗眼為洗
湔貴人一見定羞忤錦囊千紙何足捐不須更用博麻
縷付與一炬隨飛煙

雨中過舒教授

疎疎簾外竹瀏瀏竹間雨窓扉靜無塵几硯寒生霧美人樂幽獨有得緣無慕坐依蒲褐禪起聽風甌語客來淡無有灑掃涼冠屨濃茗洗積昏妙香淨浮慮歸來北堂閣一一微螢度此生憂患中一餉安閒處飛鳶悔前笑黃犬悲晚悟自非陶靖節誰識此間趣

次韻舒教授寄李公擇

草書妙絕吾所兄真書小低猶抗行論文作詩俱不敵看君談笑收降旌去年逾月方出晝

予去年留齊月餘為君劇

飲幾濡首今年過我雖少留寂寞陶潛方止酒

此行公擇病酒

夕不飲別時流涕攬君須懸知此歡墮空虛松下從橫餘

屐齒門前輾輾想君車怪君一身都是德近之清潤淪

肌骨細思還有可恨時不許藍橋見傾國

公擇有婢名雲英屢欲出

不果

送鄭戶曹

水遶彭城樓山圍戲馬臺古來豪傑地千歲有餘哀隆
準飛上天重瞳亦成灰白門下呂布大星隕臨淮尚想

劉德輿置酒此徘徊爾來苦寂寞廢圃多蒼苔河從百
步響山到九里回山水自相激夜聲轉風雷蕩蕩清河
濡黃樓我所開秋月墮城角春風搖酒杯遲君為坐客
新詩出瓊瑰樓成君已去人事固多乖他年君倦游白
首賦歸來登樓一長嘯使君安在哉

次韻黃魯直見贈古風二首

佳穀卧風雨良莠登我場陳前漫方丈玉食慘無光大
哉天宇間美惡更臭香君省五六月飛蚊殷回廊茲時

不少暇俛仰霜葉黃期君蟠桃枝千歲終一嘗顧我如
苦李全生依路傍紛紛不足愠悄悄徒自傷

空山學仙子妄意笙簫聲千金得奇藥開視皆獐苓不
知市人中自有安期生今君已度世坐閱霜中蒂摩挲
古銅人歲月不可計閨風安在哉要君相指似

次韻荅舒教授觀余所藏墨

異時長笑王會稽野鷺臙腥汙刀几莫年却得庾安西
自厭家雞題六紙二子風流冠當代顧與兒童爭愠喜

秦王十八已龍飛嗜好晚將蛇蚓比我生百事不挂眼
時人繆說云工此世間有癖念誰無傾身障簾尤堪鄙
一生當著幾兩屐定心肯為微物起此墨足支三十年
但恐風霜侵髮齒非人磨墨墨磨人餅應未罄墨先恥
逝將振衣歸故國數畝荒園自鋤理作書寄君君莫笑
但覓來禽與青李一螺點漆便有餘萬竈燒松何處使
君不見永寧第中擣龍麝列屋閒居清且美倒暈連眉
秀嶺浮雙鴉畫髮香雲委時聞五斛賜蛾綠不惜千金

求獺髓聞君此詩當大笑寒窓冷硯冰生水

送鄭戶曹賦席上果得榲子

彼美玉山果粲為金盤寶瘴霧脫蠻溪清樽奉佳客客
行何以贈一語當加璧祝君如此果德膏以自澤驅攘
三彭仇已我心腹疾願君如此木凜凜傲霜雪斷為君
倚几滑淨不容削物微興不淺此贈毋輕擲

送胡掾

亂葉和淒雨投空如散絲流年一如此游子去何之節

義古所重艱危方自茲他時著清德仍復畏人知

荅仲屯田次韻

秋來不見漢陂岑千里詩盟忽重尋
大木百圍生遠籟朱絃三歎有遺音
清風卷地收殘暑素月流天掃積陰
欲遣何人賡絕唱滿階桐葉候蟲吟

密州宋國博以詩見紀在郡雜詠次韻荅之

吾觀二宋文字字照縑素淵源皆有考
奇嶮或難句後來邈無繼嗣子其殆庶
胡為尚流落用舍真有數當時

苟悅可慎勿笑杖杜斲窓誰赴救袖手良優裕山城辱
吾繼缺短須遮護昔年繆陳詩無人聊瓦注于今廢絕
唱外重中已懼何當附家集擊壤追咸獲

答范祖禹

吾州下邑生劉李誰數區區張與李

來詩有張僕射李臨淮之句重

瞳遺迹已塵埃惟有黃樓臨泗水

郡有廳事俗謂之霸王廳相傳不可坐僕

拆之以蓋黃樓

而今太守老且寒俠氣不洗儒生酸猶勝白門

窮呂布欲將鞍馬事曹瞞

次韻答王定國

每得君詩如得書
宣心寫妙書不如眼前百種無
不有知君以一詩驅除傳聞都下十日雨
青泥沒馬街生魚
舊雨來人今不來
油然獨酌卧清虛
堂名我雖作郡古云
樂山川信美非吾廬
願君不廢重九約
念此衰冷勤呵噓

芙蓉城并敘

世傳王迥字子高與仙人周瑤英游芙蓉城元豐元年

三月余始識子高問之信然乃作此詩極其情而歸之
正亦變風止乎禮義之意也

芙蓉城中花冥冥誰其主者石與丁珠簾玉樓翡翠屏
雲舒霞卷千僇停中有一人長眉青炯如微雲淡疎星
往來三世空練形竟坐誤讀黃庭經天門夜開飛與靈
無復白日乘雲輶俗緣千劫磨不盡翠被冷落淒餘馨
因過緱山朝帝廷夜聞笙簫弭節聽飄然而來誰使令
皎如明月入牕櫺忽然而去不可執寒衾虛幌風泠泠

仙宮洞房本不局夢中同躡鳳凰翎徑渡萬里如奔霆
玉樓浮空聳亭亭天書雲篆誰所銘遶樓飛步高鈴竈
仙風鏘然韻流鈴遽遽形開如酒醒芳卿寄謝空丁寧
一朝覆水不返甝羅巾別淚空熒熒春風花開秋葉零
世間羅綺紛臃脰此生流浪隨滄溟偶然相值兩浮萍
願君收視觀三庭勿與嘉穀生蝗螟從渠一念三千齡
下作人間尹與邢

和鮮于子駿鄆州新堂月夜二首

前次韻
後不次

去歲游新堂春風雪消後池中半篙水池上千尺柳佳
人如桃李胡蝶入衫袖山川今何許疆野已分宿歲月
不可思駛若船放溜繁華真一夢寂寞兩榮朽惟有當
時月依然照杯酒應憐船上人坐穩不知漏

明月入華池反照池上堂堂中隱几人心與水月涼風
螢已無迹露草時有光起觀河漢流步履響長廊名都
信繁會千指調絲簧先生病不飲童子為燒香獨作五
字詩清絕如韋郎詩成月漸側皎皎兩相望

送將官梁左藏赴莫州

燕南垂趙北際其間不合大如礪至今父老哀公孫
烝土為城鐵作門城中積穀三百萬猛士如雲驕不戰
一朝鼓角鳴地中帳下美人空掩面豈如千騎平時來
笑談謦欬生風雷葛中羽扇紅塵靜投壺雅歌清燕開
東方健兒號虎樣泣涕懷思廉恥將彭城老守亦淒然
不見君家雪兒唱

次韻子由送趙屺歸覲錢塘遂赴永嘉

歸舟轉河曲稍見楚山蒼候吏來迎客吳音已帶鄉言
從謝康樂先獻魯靈光已擊三千里何須四十強風流
半刺史清絕校書郎到郡詩成集尋溪水濺裳芒鞋隨
採藥蠶紙記流觴海靜蛟鼉出山空草木長宦游無遠
近民事要更嘗願子傳家法他年請尚方

中秋月三首

殷勤去年月澌灩古城東憔悴去年人卧病破窓中徘徊
巧相覓窈窕穿房櫳月豈知我病但見歌樓空撫枕

三嘆息扶杖起相從天風不相哀吹我落瓊宮白露入
肝肺夜吟如秋蟲坐令太白豪化為東野窮餘年知幾
何佳月豈屢逢寒魚亦不睡竟夕相噉嚼

六年逢此月五年照離別

中秋有月凡六年矣惟
去歲與子由會於此

歌君

別時曲滿坐為淒咽留都信繁麗此會豈輕擲鎔銀百
頃湖挂鏡千尋闕三更歌吹罷人影亂清樾歸來北堂
下寒光翻露葉喚酒與婦飲念我向兒說豈知衰病後
空盞對梨栗但見古河東麴麥如鋪雪欲和去年曲復

恐心斷絕

舒子在汶上閉門相對清

舒煥試舉人鄭州

鄭子向河朔

鄭僅赴北

京戶孤舟連夜行
顓子雖咫尺如在牢扃

顓起來徐試舉人

趙子寄書來水調有餘聲

今日得趙果卿書猶記余在東武中秋所作水調歌頭

悠哉四子心共此千里明明月不解老良辰難合并回

顧坐上人聚散如流萍嘗聞此宵月萬里同陰晴

故人文生

為余言嘗見海賈云中秋有月則是歲珠多而圓賈人常以此候之雖相去萬里他日會合相問陰晴無不同者天公自著意此會那可輕明年各相望俯仰今古情

中秋見月寄子瞻

西風吹暑天益高明月耿耿分秋毫彭城閉門青嶂合
坐聽百步鳴飛濤史君携客登燕子月色著人如著水
筵前不設鼓與鐘處處笛聲相應起浮雲卷盡流金丸
戲馬臺西山鬱蟠杯中渌酒一時盡衣上白露三更寒
扁舟明日浮古汴回首逡巡陵谷變河吞巨野入長淮
城沒黃流只三板明年築城似山伐木為堤堤更堅
黃樓未成河已退空有遺迹令人看城頭看月應更好

河流深處今生草子孫免被魚鼈食歌舞聊寬史君老
南都從事老更貧羞見青天月照人飛鶴投籠不能出
曾是彭城坐中客

和子由中秋見月

明月未出群山高瑞光千丈生白毫一杯未盡銀闕涌
亂雲脫壞如崩濤誰為天公洗眸子應費明河千斛水
遂令冷看世間人照我湛然心不起西南火星如彈丸
角尾奕奕蒼龍蟠今宵注眼看不見更許螢火爭清寒

何人艤舟臨古汴十燈夜作魚龍變曲折無心逐浪花

低昂赴節隨歌板

是夜賈客舟中放水燈

青熒滅沒轉前山浪颭

風迴豈復堅明月易低人易散歸來呼酒更重看堂前

月色愈清好咽咽寒蛩鳴露草卷簾推戶寂無人窓下

咿啞惟楚老

近有一孫名楚老

南都從事莫羞貧對月題詩有

幾人明朝人事隨日出恍然一夢瑤臺客

荅王鞏鞏將見過有詩自謂惡客戲之

汴泗遶吾城城堅如削鐵中有李臨淮號令肝膽裂古

來彭城守未省怕惡客惡客云是誰祥符相公孫是家
豪逸生有種千金一擲頗黎盆連車載酒來不飲外酒
嫌其村子有千餅酒我有萬株菊任子滿頭插團團見
花不見目醉中插花歸花重壓折軸問客何所須客言
我愛山青山自遶郭不要買山錢此外有黃樓樓下一
河水美哉洋洋乎可以療饑并洗耳彭城之遊樂復樂
客惡何如主人惡

次韻王定國馬上見寄

昨夜霜風入袂衣曉來病骨更支離疎狂似我人誰顧
坎軻憐君志未移但恨不携桃葉女尚能來趁菊花時
南臺二謝無人繼直恐君詩勝義熙

二謝從宋武帝
九日燕戲馬臺

與頌起孫勉泛舟探韻得未字

窓前堆梧桐牀下鳴絡緯佳人尺書到客子中夜喟朝
來一樽酒晤語聊自慰秋蠅已無聲霜蟹初有味當為
壯士飲毗裂須磔蝟勿作兒女懷坐念蠨蛸畏山城亦
何有一笑瀉肝胃泛舟以娛君魚鼈多可餽縱為十日

飲未遽主人費吾儕俱老矣耿耿知自貴寧能傍門戶
啼笑雜猩狒要將百篇詩一吐千丈氣蕭條歲行莫迨
此霜雪未明朝出城南遺迹觀楚魏西風迫吹帽金菊
亂如沸願君勿言歸輕別吾所諱

次韻荅頤起二首

挽袖推腰踏破紳舊聞携手上天門相逢應覺聲容似
欲話先驚歲月奔新學已皆從許子諸生猶自畏何蕃
殿廬直宿真如夢猶記憂時策萬言

頤君及第時余為
殿試編排官見其

荅策語頗直其後與子由試舉人西京既罷同登
嵩山絕頂嘗見其唱酬詩十餘首頓詩中及之

十二東秦比漢京去年古寺共題名

去歲見之於青州

早衰怪

我遽如許苦學憐君太瘦生茆屋擬歸田二頃金丹終
掃雪千莖何人更似蘇司業和遍新詩滿洛城

東坡全集卷九